

## **Baseli Berther-Monn, Rueras, 1921-1997**



Gliendisdis-Tschuncheismas, ils 19 da matg 1997 annunzia il zenn la mort da nies convischin Baseli Berther-Monn da Rueras sesents en Casa s.Vigeli Sedrun.

Baseli Berther ei naschius ils 29 d' uost digl onn 1921 a Dieri. Ses geniturs ein stai Baseli Berther e Mariuschla naschida Gieriet. En cumunonza d' ina gronda famiglia da diesch fargliuns passenta el l' affonza a Dieri. Las scolas frequenta el a Rueras ed a Camischolas la scola secundara.

Silsuenter eis el segidaus cul bab el menaschi puril ed aunc fatg il resgiader a Rueras. Igl onn 1950 marida el Maria Ursula Monn da

Rueras. La famiglia crescha sin sis affons, ch' ein la legria e sulegl, la laver e quita.

Il Baseli ei sefatschentaus ina veta ora cun far il pur cun tgiert ed olma cun bia plascher ed engaschi. Dasperas eis el s' engaschaus tier las Pendicularas ed ha survigilau il parcadi a Dieri. Leu era el beinvesius dad indigenz ed jasters sco amicabel e nobel ordinatur dil traffic da parcar.

Baseli Berther ei era s'engaschaus per la publicitat ed uniuns. Aschia ha el surviu alla societad da tratga sco versau cassier. Sil sectur cultural ha el cantau el Chor baselgia da Rueras aschi ditg sco sias forzas han lubiu. Alla pleiv da Tujetsch ha el surviu plirs onns sco ugau da s.Giachen.

Il Baseli ei staus in um sempel. En el regeva ina ferma cardientscha ed ina profunda pietusadad. Bugen discurrev' ins cun el e sia promtadad per ina paterlada fuva adina dada. Avon entgins onns ha ina nauscha asma fatg fin a sias activitads e pli tard eis el staus sfurzaus da serender ensemens cun sia consorta Maria Ursula a Sedrun en Casa s.Vigeli.

Ussa ha il Segner clamau a casa il Baseli ed ils 21 da matg eis el vegnius accumpignaus sin siu davos viadi sin santeri parochial. La pasch ad el!